

Rainer Senoner president neuf dla Copa dl Mond de Gherdëina

Senteda generela dl "Saslong Classic Club": Edmund Dellago à dat ju la ncëria. La senteda generela à numinà l president neuf y l cunité diretif dla lia. Assënta iustificheda la diretëura amministrativa Stefania Demetz, che ie diventeda oma dla pitla Beatrice



Edmund Dellago y Rainer Senoner.

Copa dl Mond - La senteda generela dla lia "Saslong Classic Club", stata n merdi ai 24 de mei tla Cësa de Cultura Oswald von Wolkenstein te Sëlva, ova n ordenn dl di drët mpurtant, jìvela pu nce dla lita dl president neuf y dl cunité diretif dla lia. Senificanta perchël nce la prejënza dl'autoriteies dla valeda, danora i trëi ambolc, sciche nce de reprejentanc dla lies dal sport y istituzioneles, dl'Erma di Carabinieri y dla lies de turism. Prejënt nce Hermann Ambach, sëurastant dla FISl de Südtirol.

"La garejedes de Gherdëina pieta for cundizions perfetes" (Aksel Lund Svindal)

Chësc ie l leitmotiv che à cumpanià l pensier dla relaziuns dl president da dant Edmund Dellago y dl president neuf y nce diretëur de garejeda Rainer Senoner. La frasa dita dal campion norvegesc a dut l mond dl schi de

dezëmber dl 2015, ova te chël mumënt na relevanza mediatica strategica. Te duta Europa ne fòvel ntlëuta nia mesun urganisé na garejeda de libra de Copa dl Mond, y Gherdëina ova "fat l miracul" de la mèter a jì, à lecurdà Rainer Senoner cun rejon y cun sudesfazion, rengrazian duc chëi che à judà a fé a na maniera che l proiet (belau) mpuscibl ie unit a s'l dé. La fundamënta dl suzes ie la gran profesciunalità de duc i cunlauradëures, la despunibltà a fé i nvestimënc che va debujën y che vën damandei dala FIS y dala regules nternaziuneles, à sotrisà Rainer Senoner.

Edmund Dellago à dat ju la ncëria tl "Saslong Classic Club" do ot ani da president y bën 55 ani de lëur te ncëries desferëntes tla Copa

dl Mond de Gherdëina. Si amich y cumpani de mile batalies Erich Demetz, president d'unëur dl "Saslong Classic Club", à auzà ora che l ie nchinamei 58 ani che Edmund lëura tl mond dl schi te Gherdëina, ova pu Edmund bele cuntribui a urganisé la prima garejedes FIS A y B tla valeda.

Sun l ordenn dl di fòvel nce l'uneranza de cunlauradëures che se à fat merit y che juda ntëurite ala Copa dl Mond da bën vint ani incà. Premià iel unì Giorgio Callegari, Thomas Demetz, Manuela Perathoner y Mario Stegheer.

N assënza dla diretëura amministrativa Stefi Demetz, che à mandà si saluc tres n video ulache n la udova cun la pitla Beatrice, nasciuda de autil, à Monica

Runggaldier liet dant l rëndicont finanziael dla lia, che ie unì dat pro dala senteda di cumëmbri.

Oradechël iel unì mudà n valgun articuli dl statut dla lia, nce chisc dac pro cun la maiuranza di cumëmbri prejënc. Danter chisc iel da auzé ora l capitol numer un, che dij che la lia se tol dant de ne urganisé nia mé garejedes de schi (de Copa dl Mond), ma nce d'autra garejedes y ntraunides y manifestaziuns ntëurvìa. L articul 6 reiona di organns dla lia, l articul 12 auzà la cumpëida di cumëmbri dl cunité urganisatìf da sies a diesc (ma te chësta vela n iel ruvà ite ot), che resta te ncëria cater ani. L articul 18 sotrissea che la lia "Saslong Classic Club" ie na lia sportiva che lëura y uperea zënza fin de davani.

Stluta ju la senteda generela y do plu ntëvënc dl publich, iesen passei ala vela dl president neuf. L sël candidat fova Rainer Senoner, che ie unì numinà per atlamazion. L ie nce stat la lita dl colegh di revisëures, ulache l resta inant - nce ëi per per atlamazion - Ivo Senoner, Thomas Weissensteiner y Hans Peter Perathoner. Ala fin iel nce unì lità l cunité diretif neuf. Di dodesc candidat che se ova metù a despozizion iel ruvà ite chisc ot candidat, aldò dla cumpëida dla stimes giapedes: Horst Demetz, Monica Runggaldier, Manuela Perathoner, Marcello Cobelli, Werner Perathoner, Igor Marzola, Moritz Demetz y Thomas Wielander.

Leo Senoner



L cunité diretif neuf dla Copa dl Mond de Gherdëina. Dlongia: pra la senteda generela iel nce stat l'uneranza de cunlauradëures che se à fat merit y che juda ntëurite ala Copa dl Mond de Gherdëina da bën vint ani incà. (fotos: Werner Dejori)

